

# Puspè dapli lavur per ils impedids

Onn da gestiun da l'instituziun Argo

DA GION NUTEGN STGIER / ANR

■ En ils quatter lavuratori da l'instituziun per persunas cun impediments spirtals e corporals, l'Argo, han ins gi dapli lavur il davos onn. Quel fatg plaschaivel ha er per consequenza che l'onn da gestiun serra cun in lev gudogn. Quest onn segna l'instituziun danovamain per intginas occurrenzas culturalas. Dapi il 1970 s'engascha l'instituziun Argo per persunas impedidas e porscha cunzunt er a quellaz plazzas da lavur. Actualmain èn quai 343 posts da lavur protegids, ed en cumparaziun cun l'onn passà intgins dapli. L'instituziun è dentant er in grond patrun, lavuran tuttina stgars 300 persunas, inclus ils 28 absolvents da la protecziun civila ed ils 16 voluntaris en ils dals quatter lavuratori ed en las chasas per impedids a Cuira, Glion, Surava/Casti e Tavau.

## Tuts 192 plazs d'abitar èn occupads

Ina da las finamiras da l'instituziun saja anc adina d'integrar tant sco pussaivel las persunas cun impediments spirtals e corporals en la vita professiunala e quotidiana. Quai ha ditg ier Gieri Caviezel, dapi in onn il president da la fundaziun, a chaschun da la preschentanziun dal rapport annual 2014 da l'Argo. Quella instituziun è ina da 13 che porschan en il Grischun lavur ed in dachasa a persunas cun impediments spirtals e corporals. Er sche la devisa dal chantun, per las persunas



Orientaziun da medias davart l'onn da gestiun da l'instituziun Argo: Ruedi Haltiner, mainafatschenta, Milena Bendáková, chantadura e Gieri Caviezel, president dal cussegl da fundaziun (da sanestra).

FOTO Y. BÜRKL

impedidas saja «ambulant» avant «staziunar», sajan tuttina tuts ils 192 plazs d'abitar occupads, ha menziunà Gieri

Caviezel. Per bleras persunas impedidas na tanscha betg mo ina tgira ambulanta e perquai metta l'Argo anc adi-

na gronda paisa sin la tgira staziunara. Ina finamira saja lura er da manar ils impedids zap per zap ed uschenavant

sco pussaivel en direcziun independenza, ha ditg Gieri Caviezel.

## 11 milliuns francs dals chantuns

Ruedi Haltiner, il manader da fatschenta da l'Argo, ha preschenta il quint annual 2014 dal manaschi. Tar entradas da 25,1 milliuns francs serra quel cun in gudogn da 56 550 francs. En cumparaziun cun l'onn precedent sajan entradas ed expensas s'augmentadas per 2,6%. L'onn 2014 è il retgav brut da produenziun en ils quatter lavuratori a Cuira, Glion, Casti e Tavau s'augmentà per 6,5% sin in total da 3,2 milliuns francs. Dapi intgins onns saja quai puspè in svilup positiv, ha ditg Ruedi Haltiner als meds da massa ier a Cuira. Ina bella summa è er quella dad 8,1 milliuns francs che l'alloschi e dunsena dals cussadents porta en la cassa da l'Argo. En spezial il chantun Grischun, dentant era singuls auters chantuns sustegnan la fundaziun cun 11 milliuns francs. Il chantun sustegna bain l'instituziun, guarda dentant er sin il mandat da prestaziun che l'Argo ha cun esser sustegnida ferm dal maun public. Er il 2014 èn bleras persunas sa mussadas generusas envers l'Argo e sustegni la fundaziun cun donaziuns da stgars 181 000 francs. Il sustegn da las regiuns, nua che l'instituziun è dachasa, saja exemplaric, ha accentuà Ruedi Haltiner. Da quest mais fin a la fin da november han lieu en ils lavuratori da l'Argo intginas occurrenzas culturalas e quai cun furmaziuns indigenas. Nus rapportain anc da quella stad culturala da l'Argo.